

Gronda onur per il pionier da la granezza Peer Schilperoord

■ Peer Schilperoord dad Alvagni è vegnì onurà cul premi Dr. Rudolf Maag per sia endinada laver da pionier da passa trent'onns en connex cun la cultivaziun da granezza en las regiuns da muntogna. Padruot Fried da Lavin ha salvà il pled da laud a la sedia da questa fundaziun a Regensberg, dador Turtig, nua ch'il premi è vegnì surdà al meritaivel. La fundaziun Günthart-Maag onorescha personalitads che han merits speziali pertutgant la tgira e la promozion da plantas. L'emna passada è sa scuntrada ina quarantina da persunas en ina belleza sala medievala sin la collina da Regensberg per undrar ils merits da l'Ollandais-Grischun Peer Schilperoord che sa fatschenta da 34 onns ennà cun la tgira, la tratga e la cultivaziun da granezza en las regiuns muntagnardas. Per il rom zunt festiv da l'occurrenza ha procurà il Trio Artemis cun sia musica animanta da Bartok, che gieva bain a prà cun las intenziuns da l'onurà: Er il cumponist gieva a la tschertga da las ragischs sco Peer Schilperoord.

Distingù pervia da ses engaschament

«Peer Schilperoord vegn oz distinguò per ses engaschament instancabel en favur dal mantegniment e la cultivaziun da granezza en il Grischun ed en l'intschesch muntagnard», ha mutivà Padruot Fried, agronom da l'Agroscop a Reckenholz, la distincziun da la laver da l'undrà, il qual vala ozendi sco expert unic en chaussa en il territori da las Alps.

Il biolog ollandais è sa chasà ils 1982 en il Grischun, l'emprim a Signina, en Val Lumnezia, e davent dals 1991 è el se sent ad Alvagni. Sco manader da la societad Gran Alpin, ch'el ha timunà durant passa in decenni, è el vegni con-



Padruot Fried e Katja Dutruy surdattan il premi Dr. Rudolf Maag al perscrutader da granezza grischun Peer Schilperoord.

FOTO B. TSCHARNER

scient da las difficultads da cultivar graun en las muntognas. Cun sia savida, si' experientscha acquistada en il fratemps e ses engaschament ha Schilperoord senza dubi contribuì decisivamain a l'actuala cultivaziun da granezza en il Grischun. «Ma el ha er collavrà cun projects naziunals ed internaziunals», punctuescha Fried, per promover la cultivaziun da granezza en il Vnuost ed en il Tirol. En sia laver ha Schilperoord perscrutà pliras tschients sorts da granezzas alpinas e tratgs sorts novas da seghel, sorts

pli resistentas ed adattadas a las relaziuns muntagnardas. «Igl è il grond merit da Peer Schilperoord d'avair sa deditgà tant a la semenza sco er a l'observaziun minuziosa ed a la descripcziun detagliada da quest tresor», lauda Fried. Questas granezzas cultivescha el en divers ierts en Val d'Alvra, en Engiadina ed en Val Müstair. Ma da gronda valur sajan er sias numerusas publicaziuns, sco per exempli sia retscha davart «Las plantas da cultura en Svizra» e ses cudesch «Metamorfosas da las plantas».

«L'onurà è s'engaschè da maniera cumplexiva en favur da las plantas da cultura en la regiun da muntogna ed è cunquai in degn meritaivel en la retscha da noss distinguids», concluda Fried sia laudatio.

Senza la granezza nagin svilup uman

En in remartgabel referat ha l'onurà alura preschentà il fritg da sias retschertgas pertutgant la granezza e sias observaziuns concernent la structura da las plantas. Sco emprim ha el punctuà che sia laver

saja be stada pussavla grazia al sustegn da numerus conumans cun sumegliants ideals, sco per exempli il veterinari Hans Casper Trepp ed il pur Ueli Heinrich che avevan fundà la societad Gran Alpin ils 1987. «Senza Gran Alpin e senza ils agriculturs che cultiveschan la granezza ha mia laver nagin scopo», conceda Schilperoord. E grazia a l'impuls dad Angelika Abderhaldeh hajan pudi vegnir realisads ils ierts d'exposiziun a Samedan ed a Ftan. Ils sustegnidars da ses projects na savevan savens betg sche quai dettia a la fin insumma in resultat mesirabel, sco actualmain la cruschada da duas sorts da dumiec u ierdi, da la quala ins na sappia betg anc sch'i dettia giotta ordlonder.

In'autra part da la laver da Schilperoord tracta l'istoria da la granezza en Svizra davent da ses origin. Uschia ha el constatà che las plantas da niz derivan oriundamain da la «Mesaglina fritgaivla», oramai da la regiun tranter la Turchia, la Siria e l'Irak nua ch'igl era vegnì scuvri che las spias da tschertas ervas sajan nutritivas. Il fatg che la granezza tgembla substanzas da reserva en il coc da farina dal graun haja la finala pir possibilità la derasaziun e la prosperaziun culturala da l'umanitat. Oramai: senza granezza nagina farina e be ina derasaziun limitada dal carstga.

Ils ultims traïs decennis è Schilperoord er sa fatschentà intensivamain cun la parentella da las plantas, tschertgond lur model da basa. A fundament da sias retschertgas davart la structura da las plantas propona el in model nov per ils studis da la botanica moderna. En quest grà vegn il premi Maag al girar da render pli populara la savida davart la valur da la granezza e la bellezza da las plantas.

Bartolome Tscharner